

Sambutan Hari Keselamatan Internet 2022

‘Ramai alpa jaga adab, etika dalam dunia siber’

PM minta Keluarga Malaysia pupuk sikap bertanggungjawab ketika berkomunikasi

Oleh Rafidah Mat Ruzki
fidahruzki@bh.com.my

Putrajaya: Datuk Seri Ismail Sabri Yaakob berkata, kemajuan teknologi yang membawa masyarakat kepada penggunaan peralatan teknologi digital secara meluas sehingga ada kalangan masyarakat alpa dalam menjaga adab serta etika di dunia siber.

Perdana Menteri berkata, pandemik COVID-19 melanda negara menyebabkan berlaku transfor-

masi pada pola komunikasi dan sosial serta norma baharu.

“Namun, situasi ini menyebabkan kebanyakan kita alpa dalam untuk menjaga adab dan etika, walaupun dalam dunia siber.


“Teknologi digital banyak membantu serta melancarkan aktiviti kita, tetapi penyalahgunaan teknologi masih berlaku termasuklah dalam penggunaan internet dan media sosial oleh mereka yang tidak bertanggungjawab, sehingga muncul pelbagai jenis ancaman serta jenayah siber,” katanya dalam perkongsian melalui media sosial, semalam.

Beliau berkata demikian sempena sambutan Hari Keselamatan Internet 2022 - Edisi Malaysia yang bertemakan K.I.T.A Siber.

Sehubungan itu, Perdana Menteri meminta Keluarga Malaysia agar terus memupuk sikap kebertanggungjawaban terhadap diri sendiri dan orang lain ketika berkomunikasi.

"Teknologi digital banyak membantu serta melancarkan aktiviti kita, tetapi penyalahgunaan teknologi masih berlaku termasuklah dalam penggunaan internet dan media sosial oleh mereka yang tidak bertanggungjawab"

*Ismail Sabri Yaakob,
Perdana Menteri*



Katanya, ia boleh dilakukan dengan mengamalkan kaedah komunikasi yang mengambil kira inklusif dan tanggungjawab selain meningkatkan keakraban bagi membentuk komuniti digital yang harmoni.

“Keluarga Malaysia perlu berperanan membentuk sahsiah dan kawal sendiri bagi menyemai serta mengukuhkan kesepaduan

komuniti dalam ekosistem siber agar ancaman dan jenayah siber dapat ditangani.

“Pada masa sama, ia juga bertujuan mewujudkan persekitaran siber yang positif dan sejahtera. Selamat Hari Keselamatan Internet 2022.

“Sentiasa bijak, sentiasa selamat. Bersama-sama ke arah kesejahteraan siber,” katanya.